

**Atuartitsinerup ingerlanneqarnissaata naammassineqarnissaanut periusissat atuarnerullu nalaani atuarfiup atuartunik nakkutilliinera pillugit Namminersornerullutik Oqartussat nalunaarutaat nr. 11, 14. maj 2003-meersoq**

Atuarfik pillugu Inatsisartut peqqussutaanni nr. 8, 21. maj 2002-meersumi § 25, imm. 2 naapertorlugu aalajangersarneqarpoq:

**Kapitali 1**

*Atuartitsinerup ingerlanneqarnissaata naammassineqarnissaa pillugu iliuusissat*

*Atuarfimmi maleruagassat*

§ 1. Atuarfiup siulersuisuisa atuarfimmi maleruagassat aalajangersassavaat. Atuarfimmi maleruagassat atuartut ataatsimooqatigiittarnerannut najoqqutassiaapput torersuunissamullu tikkuussisuullutik.

Imm. 2. Atuarfimmi maleruagassat tassaapput atuartitsinerup ingerlanneqarnissaanut naammaginartumik periarfissiisussat tassuunalu atuarfiup siunertaanik piviusunngortitsiniarnermut tapertaasussat.

§ 2. Atuarfiup siulersuisui nalunaarutip periarfissiisutai tunngavigalugit atuartut atuarfimmi maleruagassanik malinninngitsut qanoq iliuuseqarfigineqarnissaannik aalajangersagaliorsinnaapput.

§ 3. Atuarfiup siulersuisui atuartup malittarisassanik eqqortitsinngitsup angajoqqaavinut ilisimatitsisarnermut taamatuttaaq tamanna pillugu angerlarsimaffiup atuarfiullu qanoq attaveqatigiinnissaannut najoqqutassanik aalajangersaasinnaapput.

§ 4. Klassini atuaqatigiit imaluunniit ingerlaqatigiit ilinniartitsisutik peqatigalugit ukiup atuarfiup aallartinneri tamaasa atuaqatigiit imaluunniit ingerlaqatigiit akunnerminni ataatsimoorinissaminnut anguniagassatik pilersaarusiussavaat.

§ 5. Atuarfimmi pitsaasumik atugassaqaarnissaq siunertaralugu atuartut, ilinniartitsisut, atuarfimmi aqutsisoq, angajoqqaat atuarfiullu siulersuisui, klassini ingerlaqatigiinnilu ataasiakkaani atuarfiup malittarisassaasa taamatullu ataatsimooqatigiinneq torersaarnerlu pillugit atuarfiup anguniagaanik atuartut paasininnissaat suleqatigiiffigissavaat.

*Periusissat*

§ 6. Atuarfimmi maleruagassat atuartup unioqqutippagit piaartumik tamatuma akuerineqarsinnaangissusia ilinniartitsisup atuartumut paaseqqullugu taakkartussavaa. Ilinniartitsisup atuartumik oqaloqateqarnermigut unioqqutitsinermut suna pissutaanersoq paasiniassavaa, tamatuma

siunertarissavaa atuartup atuarfimmi maleruqqusat qanoq pingaartiginersut paasissammagit unioqqutinneqaqqinnissaallu pinaveersaarniassammagit.

Imm. 2. Atuartup maleruqqusat unioqqutittuarpagit annertuumilluunniit unioqqutitsippat, ilinniartitsisup pilertortumik atuartoq paasitissavaa tamanna akuerineqarsinnaanngitsoq allakkatigullu mianersoqqussummik atuartoq tunineqassaaq. Atuartup angerlarsimaffia mianersoqqusuttip imaanik, tassungalu ilanngullugu sooq atuartoq mianersoqqussummik tunineqarsimanersoq unioqqutitsinerullu kingunerisinnaasaanik nassuiaatitaqartumik nalunaarfigineqassaaq. Klassip imaluunniit ingerlaqatigiit sinnerisa ingerlanissaat qulakkeerniarlugu pisariaqalerpat § 10, imm. 1-imi taaneqartoq tunaartarlugu periusissaq § 8, imm. 1-imi taaneqartoq atuutsinneqarsinnaapput.

Imm. 3. Atuartoq mianersoqquneqareerluni unioqqutitseqqippat atuartsinerup ingerlanissaa qulakkeerniarlugu tunngavissat §§ 10-11-milu taaneqartut tunaartarlugit periusissat § 8-mi taaneqartut atuarfiup atuutsilersinnaavai.

**§ 7.** Atuartup akuerineqarsinnaanngitsumik iliuuseqarnera inooqatigiinnikkut misigissutsikkullu ajornartorsiutinik atuarfimmiit pissuteqarsorinarpat iliuusissat § 8-miittut malillugit atuarfik Siunnersuisarfimmut immikkut atuartsinissamik allatullu immikkut perorsaanissamik pisariaqartitsinermik naliliisoqarnissaanut taarsiullugu malittarisaliussaaq.

**§ 8.** Atuartsinerup ingerlanneqarnissaa qulakkeerniarlugu atuarfiup atuartumut periuserinnaasat makkua atuutilersissinnaavai:

- 1) Atuarfimmi atuartsinermut allamut nuukkallartitsineq akunnerni ataasiakkaani ullulluunniit sinnerani, tak. § 9, imm. 1.
- 2) Sapaatip-akunna tikillugu atuartitaanermut peqataaqqusaajunnaarsitsineq, tak. imm. 2 aamma § 10, imm. 2.
- 3) Klassimut allamut ukioqatigisanik atuartulimmut ataavartumik nuutsitsineq, tak. imm. 2 aamma § 10, imm. 3.
- 4) Illoqarfigisami klassimut allamut ukioqatigisanik atuartulimmut nuutsitsineq, tak. imm. 2 aamma § 10, imm. 4.
- 5) Atuarfimmi atuartuujunnaarsitsineq, tak. imm. 2 aamma § 10, imm. 5.

Imm. 2. Imm. 1-imi, nr. 2-miit 4-mut taaneqartut taamaallaat 4.-10. klassimi atuartunut atuutinneqarsinnaapput imm. 1, nr. 5-imilu taaneqartoq atuartunut 10. klassini atuartuusunut taamaallaat atuutinneqarsinnaalluni.

**§ 9.** Atuartumut iliuusissat piviusunngortinneqarnissaat atuarfiup pisortaata aallartissavaa, taamaattorli tak. § 11, imm. 2 aamma 4.

**§ 10.** Atuarfimmi atuartsinermut allamut nuutsitsineq, tak. § 8, imm. 1 nr. 1 aatsaat pisinnaavoq klassip imaluunniit ingerlaqatigiit sinnerisa atuartinneqarnissaat qulakkeerniarlugu pisariaqalerpat. Atuartsinermut allamut nuutsitsineq aatsaat pisinnaavoq tamanna sioqqullugu atuartoq nammineq oqaaseqaateqarnissaminut periarfissinneqareerpat ajornanngippallu angerlarsimaffik siumoortumik tamatuminnga nalunaarfigineqareerpat.

Imm. 2. Atuartoq, tak. § 8, imm. 1, nr. 2 naapertorlugu atuartsinermut peqataaqqusaajunnaassappat piumasaqaataavoq tamanna pitinnagu siumoortumik angajoqqaat atuartorlu oqaaseqaateqarnissaminut periarfissaqarsimanissaat aammalu angerlarsimaffiup

siumoortumik tamatuminnga nalunaarfigineqareersimanissaa. Aammalu piumasaqaataavoq atuartup atuartitsinermut peqataajunnaarsinneqarnermi nalaani naammaginatsumik nakkutigineqarnissaa. Atuartitsinermut peqataaqusaajunnaarneq aatsaat immikkorluinnaq pisoqartillugu ukiup atuarfiusup ataatsip iluani ataasiaannarani pisinnaavoq.

Imm. 3. Atuartoq, tak. § 8, imm. 1, nr. 3 naapertorlugu atuarfigisamini klassimut allamut ukioqatigisaminik atuartulimmut ataavartumik nuunneqassappat atuartoq angajoqqaallu tamanna pitinnagu namminneq oqaaseqaateqarnissaminut periarfissinneqarsimanissaat piumasaqaataavoq.

Imm. 4. § 8, imm. 1, nr. 4 naapertorlugu nuutitsineq aatsaat pisinnaavoq atuartup, angajoqqaavisa atuarfimmilu nuuffigisassami atuarfiup pisortaata nuunnissaq akuerisimappassuk nuunnerlu kommunimut aningaasartuutaanerussanngippat.

Imm. 5. 10. klassimi atuartup atuartuujunnaarsitaanissaa atuarfiup pisortaata inassuteqareerneratigut kommunalbestyrelsimit aalajangiiffigineqassaaq, tak. § 8, imm. 1, nr. 5. inassuteqannginnermi atuartoq nammineq oqaaseqaateqarnissamut periarfissaqartinneqassaaq. Atuartoq angajoqqaatut oqartussaaitaanerup ataaniippat aammattaaq angajoqqaavi angajoqqaatulluunniit oqartussaaitaasut namminneq oqaaseqaateqarnissaminut periarfissaqartinneqaaqassapput. Atuartuujunnaarsitaanissaq atuartup akuerisinnaappagu kommunalbestyrelsip akuersinissaa piumasaqaataangilaq, taamaattorli atuartup inuussutissarsiummik ilinniagaqarnermilluunniit aallartitsissunneqarnissaa atuarfiup qularnaassavaa.

**§ 11.** Timikkut tarnikkulluunniit pillaaneq atorneqassanngilaq.

Imm. 2. Atuartut allanut nakuuserniarnerat pigisanilluunniit aserorterneramik innarliinissaat pinngitsoortinniarlugu pisariaqartitsineq naapertorlugu pissaaneq atorneqarsinnaavoq.

Imm. 3. Pissaaneq atorneqartariaqarpat ingerlatiinnarlugu tamanna allakkatigut atuarfiup pisortaanut nalunaarutigineqassaaq, taassumalu ingerlatiinnarlugu angajoqqaat tamatuminnga ilisimatissavai.

Imm. 4. Atuartoq pissaanermik atuiffigineqartoq ilinniartitsisumit ingerlatiinnarlugu klassimi atuartitsinermi anisitaasinnaavoq, ilinniartitsisullu pisumik nalunaarutiginninnera tunngavigalugu atuarfiup pisortaata iliuuserisassat pisariaqartinneqartut suuneri aalajangiiffigissavai.

## **Kapitali 2**

### *Atuartitsinerup nalaani atuartunik nakkutillineq*

**§ 12.** Atuarfimmil atuarnerup nalaani, anitsiarfinni, nerinerup nalaani allanilu naammattumik atuartut nakkutigineqarnissaannut kommunalbestyrelsi akisussaavoq.

Imm. 2. Kommunalbestyrelsip aalajangersagaasa iluanni atuarfiup siulersuisuisa atuarfiup atuartunik nakkutillinissaa erseqqinnerusunik malittarisassaliorsinnaavaat.

Imm. 3. Atuarfiup pisortaata nakkutillinerup qanoq ingerlanneqarnissaa aalajangiiffigissavaa.

Imm. 4. Naammattumik nakkutillineq imatut paasineqassaaq, nakkutillineq pissutsit naliliiffiginerat aallaavigalugu imarisamigut annertussutsimigullu pisariaqartitsineq naapertorlugu naammattuusorinarloq, makku tamatumunnga ilanngullugit

-atuartut qanoq ukioqarnerat

-sammisap suunera

-najukkami pissutsit aamma

-init aaqqissugaaner atortuulu.

Imm. 5. Ilinniartitsisut ataasiakkaat tamarmik atuarfimmi maleruaqqusat malinneqarnissaanut qulakkeerinissamut pisussaaffeqarput unioqqutitsisoqarpallu akuliutissallutik pisussaapput, soorlu atuarfiup pisortaanut saaffiginnikkut. Tassa ilinniartitsisusut ataasiakkaat nakkutilliisutut pisussaanerat ilinniartitsisup skemanut imaluunniit suliassat agguataarneqarsimanerit killeqanngilaq.

**§ 13.** Atuarfiup nakkutilliisussaatus pisussaanera aallartittarpoq atuartitsinerup aallartinnissaa minuttinik qulinik sioqqullugu, naammassisarporlu atuartut atuartitsinerup naanerata kingorna atuarfimmit qimagutereernerisa kingorna.

Imm. 2. Atuartut atuartitsineq minuttit qulit sioqqullugit, imaluunniit atuartut atuarnerup naammassinerata kingorna pisassaqlutik, soorlu sunngiffimmi atuartitsinerup aallartinnissaa utaqqigunikku, allamilluunniit pissuteqarlutik atuarfik qimanngippassuk, sumiiffimmilu oqartussaasut nakkutilliisoqarnissaa pisariaqartoq nalilerpassuk, immikkut ittumik nakkutilliinissamik isumaqatigiissusiortoqassaaq.

#### *Nakkutilliisussaataanerup atuuffia*

**§ 14.** Atuartut atuarfiup iluaniinneranni atuarfiullu illutaata akisussaaffigisaatalu iluaniinneranni nakkutilliineqassaaq. Nakkutilliinermut aamma ilaavoq atuarfiup qanittuani aqqusinermi atuarfiup malittareqqusia atuartunit malinneqarnersut nakkutigineqarnissaat. Atuartut atuariartorlutik aqutigisartagaat atuarfiup nakkutilliineranut ilaatinneqanngillat.

§ 15.

Atuartitsineq atuarfiup avataanut inissinneqarsimappat atuartut atuarfigisassamit atuarfiullu akornanni ingerlaartarnerat pisariaqarnera naapertorlugu nakkutigineqartariaqarpoq. Aammattaaq nakkutilliisussatut pisussaaffittut ilaavoq atuarfiup aaqqissugaanik angallassinermi siumut utimullu ingerlaartitsineq.

#### *Nakkutilliisussaataanerup imaa*

**§ 16.** Ilinniartitsisut atuartitsinerup nalaani atuartunik nakkutilliisussaataapput.

Imm. 2. Klassimi atuartunik ingerlaqatigiinnut eqimattanulluunniit agguataarneqarnerup kingorna atuartut inini assigiinngitsuniippata atuartunik nakkutilliineq ingerlanneqarsinnaavoq ilaatigut siumut ilitsersuereernikkut. Aamma taamaappoq atuartup atuarnermut atatillugu atuarfik qimattariaqarpagu.

Imm. 3. Pingaaruteqavissumik pissuteqaruni atuartoq aatsaat atuartitsinerup nalaani atuarfik qimallugu aninissamut akuerineqarsinnaavoq.

**§ 17.** Atuartitsineq inini immikkut navianartorsiorfusinnaasuni ingerlanneqarpat, soorlu fysik/kemirtarfinni, sannavinni, eqaarsaartarfinni timersortarfinnilu, atuarfik sukumiisumik nakkutilliisussaavoq.

Imm. 2. Allani immikkut nakkutilliinissaq piumasaqaataasimappat atuarfiup tamakkua eqqortinneqarnissaat nakkutigissallugu pisussaaffigivaa.

§ 18. Atuartitsineq skema malillugu nalunaaquttap akunnerinik unitsinneqarpat annerni atuartut atuarfimmiginnarsinnaallutillunniit atuarfimmik qimatsisinnaapput.

Imm. 2. Atuarfimmi siulersuisut aalajangersinnaavaat aalajangersakkami imm. 1-imi anitsiarfinni aamma nalunaaquttap akunnerini atuartitsiffiunngikkallartuni tamanna aamma atorneqassanersoq.

Imm. 3. Immikkut ittumik pissutissaqarpat atuarfiup pisortaata imm. 1 aamma imm. 2 sanioqqullugit atuartut ataasiakkaat atuarfimmik qimatsinissaat inerteqqutigisinnaavaa. Aammattaq angajoqqaat qitornamik anitsiarfimmi akunnernilu atuannigiffinni atuarfimmiginnarnissaat piumasarisinnaavaat.

Imm. 4. Atuarfiup qimannissaanut atuartoq akuerineqarsinnaavoq tamanna isumannangitsutut nalilerneqarpat.

### *Paasisassarsiornermi angalanermi allanilu nakkutilliineq*

§ 19. Atuartut paasisassarsiorlutik angalanerinni, suliffeqarfinnut pulaaqatiginerini, timersornernut tungassuteqartunik sammisaqarnerini, umiartornerini assigisaallunniit atuarfimmit aaqqissuunneqartut aningaasaliiffigineqartullu peqataaffigineqarnerini nakkutilliiffigineqartassapput. Nakkutilliisussaataaertaaq atuuppoq atuarfiup suliassaanut atatillugu aallaarsimaarnerni, tammaarsimaarnerni imaluunniit atuarfik arlaatigut aaqqissuisuutillugu.

§ 20. Atuartut misiliinerisa nalaanni sullivinniitillugit suliffeqarfinniitillugit assigisaannilu atuarfiup nalinginnaasumik nakkutilliisussaataanera atuutinngilaq. Taamaattorli atuartunut tunngatillugu mianersorfissaqartoq malugineqarpat atuarfik pisussaajuarpoq akuliutissalluni.

Imm. 2. Atuartut sullivinni suliffeqarfinnilu misiliillutik sulinerminni sulliviup sulisuinut isumannaallisaanikkut malittarisassanut, sullivinni avatangiisit pillugit inatsisitigut aalajangersakkat malillugit suliarineqarsimasunut ilaatinneqarpat.

§ 21. Paasisassarsiorluni angalaarnermi, tammaarsimaarnermi atuaqatigiillu angalanerinit assigisaanniluunniit aatsaat nalunnguartoqarsinnaavoq tamanna isumannaatsumik pisinnaappat.

§ 22. Ilinniartitsisut atuartullu atuarfiup illuutaani imaluunniit anitsiartarfiup ilusilerneqarneratigut arlaannik ulorianarsinnaasumik naammattuugaqarunik tamatuma atuarfiup pisortaanut nalunaarutiginnissaanut pisussaapput.

## **Kapitali 3**

### *Atuutileraneranut atuukkunnaarsitsinermullu aalajangersakkat*

§ 23. Nalunaarut 1. august 2003 atuutilerpoq.

Imm. 2. Tamatumunnga peqatigitillugu Meeqqat atuarfianni torersaarluarnissamik pilersitsiniaanissaq pillugu Namminersornerullutik Oqartussat nalunaarutaat nr. 10, 15. april 1991-imeersoq aamma Atuartunik nakkutilliineq pillugu Kulturimik atuartitsinermillu aqutsisut kaajallaasitaat nr. 8/80 atuukkunnaarput.

Namminersornerullutik Oqartussat, ulloq 14. maj 2003.

Arkalo Abelsen

/

Lise Lennert Olsen